

Was merr su babbeld

Hosde dess gelese?
Was donn?
Ei dess hier im Blättche.
Was stiehden doo?
Ebbes iwwer die Störch.
Iwwer die Störch?
Ja, iwwer die Störch uff de Deponie.
Uff de Deponie?
Doo hawwese doch e Stong uffgestellt.
E Stong?
Ja, e Stong mettem Storchenest.
Unn doo sinn Störch druff?
Ja, dissjohr mett drei Junge.
Drei Junge? Hott die ooner geseh?
Ja. De Zürn mettem Fernglas.
Donn werrds stimme.
Der hott aach geseh, dass de Vadder Storch ...
Woher waaßen der, wer de Vadder iss?
Wie moonsden dess?
Oon Storch sieht doch wie de onnern aus.
Awwer die Störch werrns wisse.
Was?
Wers Männche unn wers Weibche iss.
Die Störch ja, awwer de Zürn?
Der siehts onn dene ihrne Ring.
Stieht doo ihrn Nome druff? Jupp odder Emma?
Naa, weil jeder Ring hott e Nummer ...
No unn?
... unn iwwer su e Nummer kann merr erfahn ...
... wer Vadder unn wer Mudder iss?
Ja, dess kann merr. Unn noch mehr.
Was donn?
Wo die uff die Welt kumme unn beringt worrn sinn.
Dess iss joo doll.
Unn su waaß merr, dass der oone Storch ...
Was donn?
... e Weibche aus Deitschlond iss.
Unn de Vadder?
De Vadder iss enn Fronsuus.
Enn Fronsuus? All kumme se bei uns.
Wer?
No ja, die Mensche unn aach die Störch.
Iss doch nitt schlimm, odder?
Unn donn kriehnse enn Haufe Noochwuchs unn ...

Unn was?

... unn den misse merr all bezahle.

Jetzt heer awwer uff.

Weil su junge Störch wolle späder aach wohne.

Was heeßden dess?

Dass die aach widder e paar Stonge brauche.

Du musst se doch nitt bezahle.

Awwer mir Steierzahler, odder nitt?

Dess gieht alles iwwer Spende.

Aus de EU odder wie?

Unn warum aus de EU?

Ei weil doch enn Fronsuus debei iss

Eiern Honnes